

"Cjantâ Vilotis" premià tel Friul

L CD realisà con Antonella Ruggiero da l'Istitut Cultural Ladin de Fascia se à vadagnà l prum pest a l'event "Musiche - pe gnove musiche furlane" a Udin, adum con i Fil & Fiâr



Loris Vescovo e Caia Grimaz, da man cencia, con Antonella Ruggiero e le Marmar Cuisine endèna l concert "Cjantâ Vilotis" a Cianacei.

Mendranzes en musega - Na bela neva che revèrda la musega ladina ne é ruèda chisc dis dal Friul. En domenia ai 6 de de zember al teater "Palamostre" de Udin l'é stat metù a jir l'event "Musiche - pe gnove musiche furlane", n apuntament che à oramai passà via la edizion numer 20 e che ogne an l premia la più bela produzion discografiche en "marilenghe".

"Musiche" l'é la rassegna anuèla de la mior produzion musicale dal Friul, e l'é la soula de chesta sort anter duta la comunanzes de mendranza che vif tel stat talian. Chest an, te na edizion che organisadores e esperc, e anter chisc Radio Onde Furlane e so diretor artistich Mauro Missana, à defeni de autiscima calità, adertura "una de la miores di ùltime egn", diesc partezipanc selezioné à tout pèrt al concert, che desche zenza apede ai "big" l'à prejentà enche la proponetes de artisç joegn che cianta per furlan o per i etres lengac mendres del teritorie furlan, a chi che ge vegn dedicà l Premi Friul.

N gran publich à podù scutèr la cianties di "big": artisç anter i più cognosciui e aprijé de chela region cernui fora te la setemènes dant da n "Osservatorie" de giornalisç e critics de musega che se à scutà duta la neves de la rica produzion musicale modernes tel lengaz furlan, per ruèr a selezionèr Francis and the Phantoms, jà venjidores de na edizion passèda del Premi Friul,

e dapò Loris Vescovo e Caia Grimaz, che i ladins à podù cognoscer tel concert "Cjantâ Vilotis con Antonella Ruggiero" portà dant l'an passà enche a Cianacei, e amò i Fil & Fiâr con so CD "Platimi", che compagna i tesç poetics de Massimo Govetto con n sound rock alternativ e a gressif, e l ciantautor cjargnel Luigi Maieron con so ùltim lurier "I Turcs tal Friul", da na opera teatrèla de Pier Paolo Pasolini.

Anter chisc, descheche l'era tel program, endèna la manifestazion fossa stat cernù "la produzion più segnificativa de l'an", premièda con la Targa Deganutti.

Chest'outa la gran calità di prodoc porté dant à metù en dificoltà i esperc, e a la fin l prezios recognosciment é stat sparti en doi, e dat ex aequo a Loris Vescovo e Caia Grimaz per "Cjantâ Vilotis" e ai Fil & Fiâr per "Platimi".

L Premi Friul é jit enveze a l'Orchestra Cortile, n grop de la provinzia de Pordenon e na menzion a Eleonora Cedaro, na "Joan Baez" da Moggio, pascionèda de folk american.

La musega en marilenghe cresc e va inant se slarian fora enche te anter i joegn con produzion semper neves, e foradecà troa lèrga e aprijiamment enche chela ladina, con projec e produzion desche "Cjantâ Vilotis", bogn de portèr en aut e fèr cognoscer l lengaz ladin sorafora i confins. (lg)



L placat de la manifestazion de Udin.